

Lai sèptieme piaînnatte feut lai Tière.

Lai Tière n' ât pe ène piaînnatte quéconque. An yi compte cent onze rois (en ne rébiaint pe, bîn chur, les rois noirats), sèpt mil dgéograipbes, nûf cent mil hannes d'aiffâires, sèpt miyons èt dmé de pieinteusses, trâs cent onze miyons d' ordious, ç' ât è dire envirvô (*environ*) dous miyards de grantes dgens.

Po vos bèyie ène aivisiaye des dimeinchions de lai Tière i vos diraî qu' aivaint l' orine de l' élèctrichitè an yi daivait entretni, tchu l' ensoinne des ché cont'neints, ène voirtâbye airmèe de quatre cent soichantedous mil cîntyè cent onze aillumous de raimboiyous.

Vu d' ïn pô laivi çoli fsaît ïn airiole (*splendide*) éffièt. Les émeûyaidges (*mouvements*) de çt' airmèe étînt cment ces d' ïn ballat d' opéra. Dvaint vnait l' toué des aillumous de raimboiyous de Novèlle-Zélande èt d' Australie. Èt peus ces-ci, aiyaint enfûe yôs laimpattes, s' en allînt dreumi. Aidonc entrînt en yôt' toué dains lai dainse les aillumous de raimboiyous de Chine èt de Sibérie. Èt peus, yos âchi s' échlâmotînt (*s'escamotaient*) dains les couiches (*coulisses*). Aidonc vnait l' toué des aillumous de raimboiyous de Russie èt des Îndes. Èt peus de ces d' Aifritçe èt d' Europe. Èt peus d' ces d' Aiméritçe d' lai sen-di-tchâd (*sud*). Peus d' ces d' Aiméritçe d' lai sen-di-fraid. Èt djmais ès n' se trompînt dains l' oùdre d' entrèe en sceîne. C' était bîn grant (*grandiose*).

Tot d' pai yos (*seuls*), l'aillumou di seingne raimboiyou di pôye d' lai sen-di-fraid, èt son confrère di seingne raimboiyou di pôye d' lai sen-di-tchâd, moinnînt des vies d' épragâtè (*oisiveté*) èt de nontchâyainche : ès traivaiyînt dous côs poi annèe.